

陶文毅公全集

陶文毅公全集卷二十六目錄

奏疏 保甲

查辦皖省棚民編設保甲附片

編查皖省棚民保甲摺子

會同皖撫查禁棚民開墾摺子

覆奏沿海港汊村莊設法編查摺子

奏疏 保甲

查辦皖省棚民編設保甲附片

再 臣 於五月二十日接奉

廷寄道光四年五月十六日奉

上諭本日御史郎葆辰奏請飭查棚民保長以重地方
據稱會典內載乾隆四年戶部議准江南福建浙江
各府州縣內棚民照保甲例編排戶口近聞浙江江
蘇安徽等省州縣凡深山窮谷之區棚民曼衍殆遍
租典山地墾種山諸大半皆溫台一帶沿海之人其
聲氣相通倘有奸宄藏匿不可不豫爲防範等語向

來各省地方有棚居士著山民往往以種植麻靛煽
鐵造紙等項藉資生計其外來無業游民前赴該處
工作者亦一體編入保甲選立保長甲長專司巡察
責成州縣官據冊稽查誠以該棚民等良莠不齊往
來靡定若任其占踞山場不加約束勢必愈聚愈多
無從究詰是以照例編排立法極爲周密惟行之日
久懈弛相沿自應亟爲整頓著各該督撫等嚴飭該
府州縣將棚民逐細查察按十戶設立甲長每年遞
換門牌隨時抽驗禁止匪類潛匿勾串滋事如查有
不安本分鬪狠健訟之徒立即嚴拏示懲務當實力

奉行不可視爲具文並不准書役藉端擾累以靖地方將此各諭令知之欽此遵

旨寄信前來

臣

伏思編查保甲爲弭盜詰姦要法皖省

向係遵照章程飭令各州縣於秋後確切編查年底循例具

奏至徽州寧國池州廣德四府州屬境內深山峻嶺甚多往往有外來民人租山墾種搭棚棲止緣本境多將山地出租此等無業窮民因之攜老挈幼刀耕火種就地謀生

國家休養生息生齒日繁勢不能分畛域而阻其生

路惟聚處衆多良莠不齊卽難保不滋生事端是以向係一體編入保甲辦理在案通計徽州寧國池州廣德四屬此項棚民有由江廣遷往者亦有由本省桐城潛山宿松太湖舒城霍山等處遷往者非盡溫台沿海之人現在均屬安靜間有鬪狠健訟之徒亦俱隨時隨事嚴行懲辦不令縱恣今奉

諭旨逐細查察自應欽遵飭辦其棚民較多之處應卽按十戶另設牌甲稽查倘係零星三兩戶雜在土著之內卽歸入附近保甲內照舊辦理務俾奸民

絕迹亦毋任書役藉端滋擾仰副我

皇上除莠安良之至意除飭行藩臬兩司並該府州實力查辦外謹附片覆

奏伏乞

聖鑒謹

奏

道光四年七月十四日奉到

硃批認真稽查辦理不可有名無實欽此

編查皖省棚民保甲摺子

奏爲皖省各屬居民及附住棚民分別編查保甲仰

祈

聖鑒事竊嘉慶二十年正月欽奉

上諭那彥成奏酌定覆查保甲章程一摺所奏每年秋收無事後外出耕作及各項傭工人衆歸里之時再行稽核一次免致匪徒溷跡所奏甚爲核實著各直省通行照辦督撫於歲底彙奏一次等因欽此又於道光四年五月欽奉

上諭著各該督撫等嚴飭該府州縣將棚民逐細查察

按十戶設立甲長每年遞換門牌隨時抽驗禁止匪類潛匿勾串滋事如查有不安本分鬪狠健訟之徒立即嚴拏示懲務當實力奉行不可視爲具文等因欽此遵查安徽一省濱帶江湖繁連淮泗省北各屬接壤徐豫地偏人悍匪徒出沒其間夙稱難治省南一帶居民較爲團聚守望易於聯絡而深崖幽谷亦頗藏奸稽查均應嚴密至棚民一項則徽州寧國池州廣德四府州往往有之緣該境山嶺較多外來民人搭棚棲止租種山地雖係貧民謀食之常與川陝等省山佃情形無異但人數旣多卽

良莠不齊難保不滋生事端是以向同土著民人

一體編入保甲俾資查考本年欽奉

諭旨飭查當經督

臣及臣

先後將查辦緣由恭摺具

奏並飭藩臬兩司於秋後委員會同各該州縣逐一

編查去後茲據藩司徐承恩臬司劉斯昺詳據各

州縣於秋收後遵照章程將各屬編造門牌冊籍

情形稟報並經道府直隸州覆稱就近挨查無異

其棚民一項飭委候補知府劉湜前往查辦據稱

會同各州縣親履山場按戶編排查明一處卽就

中選擇誠實棚民作爲棚頭通計徽州府屬之歙

縣共有棚民一百五十六戶選充棚頭十七名休
寧縣共有棚民二百三十一戶選充棚頭十三名
祁門縣共有棚民四百三十二戶選充棚頭二十
四名黟縣僅有棚民十戶選充棚頭一名績溪縣
共有棚民十二戶俱散住各保不便編設棚頭仍
令各地保兼管寧國府屬之寧國縣共有棚民四
百九十一戶選充棚頭二十三名池州府屬之銅
陵縣共有棚民十八戶選充棚頭二名建德縣共
有棚民一百二十二戶選充棚頭十二名廣德州
共有棚民一千二百七十九戶選充棚頭四十四

名其保內僅有棚民數戶者仍令鄉保兼管均已
繕造門牌底冊分別懸掛存案飭令所選棚頭時
加查察現在各處棚民均屬安靜等情由該司等
逐加查核詳請具

奏前來臣查編查保甲爲除莠安良要法必須辦理
認真庶使匪類胥除閭閻安輯其棚民一項經此
次編查之後卽以現造戶口冊籍立案毋許任意
增添各業主亦不得再行私租以致日益加多莫
可究詰遇有遷移隨時更換申嚴約束實力奉行
並不准書役藉端擾累以仰副

聖主除暴安良之至意所有道光四年各屬居民及附
住棚民分別編查保甲緣由謹會同大學士兩江

總督臣孫玉庭合詞具

奏伏乞

皇上聖鑒謹

奏

道光五年正月二十五日奉到

硃批知道了欽此

會同皖撫查禁棚民開墾摺子

奏爲遵

旨查禁棚民開墾仰祈

聖鑒事竊臣等前准軍機大臣字寄奉

上諭據御史陶士霖奏棚民開山種植病農藏奸請飭
查禁一摺江南素稱沃壤若棚民開山種植日漸加
增土鬆石碎大雨衝刷盡納於下游河港之中年復
一年必致淤塞河道且俱係外籍蹤跡難測匪奸窩
盜難保不滋生事端著陶澍等嚴飭所屬各州縣嚴
密管束或寬予期限令其漸回本鄉其未經開墾之

山著卽嚴行查禁毋令日久滋弊原摺著鈔給閱看
等因欽此當卽札飭藩臬兩司會議詳辦並經臣陶
澍臣色卜星額附片先行覆

奏在案茲據安徽布政使程琳采會同署按察使胡
調元會議具詳前來臣等伏查嘉慶十二年同徽
州府休寧縣耆民程元通京控案內經前安徽撫
臣初彭齡

奏准部議棚民契約載有年限者概俟限滿退山回
籍其年限已滿並未載明年限而承種已逾十年
者再種一年退回如年限未滿業主情願還租及

許訟到官飭退租價按年分攤如置有田產與土著民人締姻編入保甲者與土著無異應令入籍至棚民退山後不得仍種苞蘆改種茶杉培蓄柴薪以免坍瀉如仍有將山場混召異籍之人搭棚開墾至五十畝者無論公業私業發邊遠充軍不及五十畝者減一等租價入官承租之人不論山數多寡照強占官民山場律滿流爲從減一等欽奉

諭旨依議欽此又道光四年奉

上諭將棚民逐細查察按十戶設立甲長每年遞換門

牌隨時抽驗禁止匪類潛匿勾串滋事等因復經臣

陶澍於安徽巡撫任內

奏明欽遵飭辦其棚民較多之處卽按十戶另設牌
甲稽查倘係零星三兩戶雜在土著之內卽歸入
附近保甲內照舊辦理欽奉

硃批認真稽查辦理不可有名無實欽此又上年八月
欽奉

上諭棚民開種山地最易藏奸亦應驅除嚴行封禁等
因欽此復經臣色卜星額以來安縣既有棚民七百
餘戶請查照徽州府屬棚民之例辦理仍按十戶

設立牌長十牌設立棚長合一山設立棚頭責令稽查匪類令該縣按季親赴各山編查一次秋後責成該管知州抽查彙入編查保甲案內出具並無續墾新戶及窩留奸匪印結各在案是寬限回籍稽查匪類並嚴禁開墾均已立有章程因頻年來疊遭荒歉外來窮民藉山種植以謀口食未便遽行驅除致滋失業然恐因此稍有鬆弛貽累地方如土鬆入河易致淤塞尤爲切實情形不可不嚴行防禁此該御史陶士霖所以

奏請飭禁也查自上年來收成獲稔米糧平減流民

漸次回籍其搭棚居住各戶均照屢次章程辦理
不致滋生事端似可毋須另立科條惟思棚民來
自遠方貲本無多苟非本境之人招引租留亦安
能以有主之山混任開墾是欲清其源尤須申嚴
山主之禁嗣後無論公山私產概不准其違例召
租開墾如有違犯卽查照定章問擬重辦俾藩籬
旣固外來自少棚民不致增添自不至有墾土藏
奸之事其向無棚民之州縣應令該地方官嚴行
禁止年終出具並無棚民印結通送查考以昭核
實謹合詞恭摺覆

奏伏乞

皇上聖鑒訓示謹

奏

道光十七年四月十七日奉到

硃批另有旨欽此同日奉到道光十七年四月初七日

內閣奉

上諭前據御史陶士霖奏棚民開山種植病農藏奸請
飭查禁一摺當降旨著陶澍等嚴飭所屬各州縣嚴
密管束或寬予期限令其漸回本鄉其未經開墾之
山卽嚴行查禁毋令日久滋弊茲據該督等查明棚

民開山其應行寬限回籍稽查匪類並嚴禁開墾均已立有章程自上年秋收豐稔以來流民漸次回籍其搭棚居住各戶均照屢次章程辦理不致滋生事端惟棚民來自遠方貲本無多若無本境之人招引租留豈能自行開墾嗣後無論公山私產概不准其違例召租開墾如有違犯卽查照舊定章程問擬重辦其向無棚民地方著責成該地方官嚴行禁止年終出具並無棚民印結通送查考以昭核實仍著該督等嚴飭所屬認真稽查隨時妥辦如日久弊生以致有名無實惟該督等是問欽此

覆奏沿海港汊村莊設法編查摺子

奏爲遵

旨籌議章程恭摺覆

奏仰祈

聖鑒事案查前准兵部咨欽奉

上諭御史王藻奏請將沿海港汊村莊設法編查履勘以絕窩緖而清盜源一摺各省沿海地方文武員弁平日認真稽查盜匪與奸民不能暗相勾通根株盡絕洋面自可肅清如該御史所奏沿海地方港汊村莊距海遠近不等盜船敢於入港總由奸民爲之窩

綫代銷贓物添雇舵船水手或稔知村內殷實之家勾通入劫盜去而人不敢過問沿海一帶雖設有水師總巡分巡各名目往來會哨多屬虛應故事潛匿港口僅令微末弁兵代巡捏報無怪海洋劫案時聞不可不嚴加防範惟各省近海處所情形不同應如何稽查周密自當因地制宜著直隸山東江蘇浙江福建廣東沿海各督撫妥議章程據實具奏摺並發欽此當經

臣

照行各司道鎮悉心籌議應如何稽查

周密會議章程並以江南沿海南接浙江北通山東境地綿長村莊既遠近不等港汊又紛歧不一

必須切實履勘逐細編查妥議詳覆復疊次分別
行催去後茲據署江蘇按察使裕謙等詳稱據沿
海各州廳縣暨該管府州先後勘查議覆並准蘇
狼兩鎮移稱水師巡洋遵照御史周彥條奏嚴定
會哨功過已有章程可循巡緝並無曠誤茲復按
海口港汊村莊各情形會議章程詳請覆

奏前來

臣

查江南洋面極爲遼闊如蘇州府屬之常

熟昭文二縣松江府屬之川沙廳及華亭奉賢金
山上海南匯五縣淮安府屬之阜寧鹽城二縣揚
州府屬之東臺縣太倉州及所屬之鎮洋寶山崇

明三縣通州及所屬之如臯縣海州及所屬之贛榆縣並直隸海門廳非近處海濱卽孤懸海甸其間島嶼林立支港紛繁必須海口肅清庶洋匪無可潛匿亦必須洋面嚴密庶奸民亦無可勾通是海口內外巡緝編查原不可稍存疏畧也查江省沿海口岸均設有委員駐守稽查內外洋面亦按季派定總巡統巡分巡各員往來會哨卽外洋羊山島嶼皆有員弁駐巡防範稽查外洋實已周密今蒙

聖訓諄諄復將口內村莊港汊逐一履勘編查使內無

濟匪之人外無銷賊之路實足以清盜源而肅海
洋臣惟有嚴飭該管文武及守口巡洋各員弁實
力嚴查巡緝務使海洋內外一律靜謐如稍事疎
懈卽行嚴參以仰副

聖主弭盜安良之至意謹會同江蘇巡撫臣陳鑾江蘇

提督臣陳階平合詞恭摺具

奏並將司道詳議章程繕呈

御覽伏乞

皇上聖鑒訓示謹

奏

謹將沿海州縣港汊村莊設法稽查巡緝章程恭
呈

御覽

一沿海村莊逐一編查保甲以清盜源也保甲爲
緝匪良法江蘇省無論腹地沿海均已遵照奉
行立法本屬周備惟沿海村莊大小不等遠近
不一且有零星散處者一有遺漏奸宄卽易於
潛藏現將沿海村莊逐一編查十家爲甲設立
甲長一人每編十甲設立總甲一人不及十甲
者卽按三五甲爲一總不及十家及零星散處

者卽於一處各設一長責成地方正印官親往
抽查諭令甲長總甲互相稽訪如有濟匪消賊
窩藏勾引代雇水手之家密速報官拏究從優
獎賞知情容隱一體治罪倘地方官視爲故事
奉行不力卽嚴行參處以儆怠玩

一沿海港汊口岸添卡添巡盤詰船隻俾無縱漏
也查江蘇省沿海口岸要隘原各設有營汛派
撥員弁兵役巡查惟地勢寬廣巡緝恐未能周
到現查各口相距遼闊之處均令各捐卡房一
座由該管文武添派兵役輪替駐巡其偏僻沙

灘亦飭該管縣酌派兵役梭織巡查並責成守
口員弁及該管文武凡遇船隻出入驗無牌照
形跡可疑及偏僻不常泊船處所有以小舟渡
人上岸及起卸貨物者均卽嚴行盤詰稟解該
地方官究明實係盜匪卽將原獲之兵役視獲
犯之多寡罪名之輕重量予獎賞倘敢疎縱別
經獲犯發覺卽將該管員弁兵役分別參懲仍
曉諭各總甲人等互相稽查兵役人等倘敢得
賄包庇卽行據實稟首以憑懲辦

一商漁等項出海船隻仿照保甲稽查不准出租

以杜影射也查江蘇省民間商漁各船遇有買賣頂補等項事故向由地方官訊取地隣人等供結方准給照行駛不准私租頂冒誠恐日久弊生將船私租匪人及在洋劫占商船駕駛行劫以致奸良莫辨現已責令各州縣仿照保甲之法十船編爲一甲取具連環保結方准出洋並令依限換照不准逗遛洋面如一船爲匪九船連坐倘敢將船私租頂冒致令匪徒出洋爲盜無論是否知情均將船主人等從重治罪船隻入官充賞如遇漁汛之時沿灘採捕漁船並

照保甲之例十船編爲一甲僉派漁甲一名責成按號稽查辰出酉歸如有遠駛不歸本塢停泊及爲匪通盜立即稟究漁甲徇隱一體連坐一水師員弁按照定例巡洋會哨分別勸懲不任疎懈以肅洋政也查海洋巡緝責重水師江蘇省外海洋面設有總巡統巡分巡委巡按照定例出洋分班巡緝內洋洋面亦各按所轄洋面汛境派撥兵船往來梭織偵巡有犯必獲均足以資捍衛又於御史周彥條奏嚴定海洋會哨案內

奏奉部議嗣後隨帶會哨營弁千把等官除於會哨期內如有拏獲盜匪奸船例應議敘及遇有失事託故不行例應降罰均遵照定例辦理外如果熟諳水性不畏風濤於巡洋期內並無失事案件每哨一次准記功二次分別考核保獎若有不諳水性畏懼風濤者初次記過仍令下次再行出洋試看倘仍不得力卽行改撥陸路習練以觀後效如此勸懲兼行立法已極周密遵照實力奉行海洋自可肅清

一沿海各屬米穀不准私載出洋以杜偷漏接濟

也查米石例禁出洋是以商漁船隻隨帶食米均應填給印票由守口員弁查驗放行其朝出暮歸沿灘採捕之小船例不准其配米向有定制第恐不肖船戶冀圖厚利私自多買米石偷運出洋接濟盜匪不可不防現今守口員弁逐細查驗如有暗藏多帶即將人船送交地方官究辦倘偷漏出洋致被別處拏獲發覺即將未能查出之員弁嚴行參處如係兵役賣放亦卽從重懲辦

一私藏槍礮軍火器械宜嚴行查禁收繳也查軍

火器械例禁私藏應責成沿海地方文武並巡
洋舟師在於沿海各處實力搜查收繳稟報分
別配用銷毀不任藉口防盜適以濟盜如有藏
匿製造等弊一經破獲立拏私藏私鑄奸民及
容隱之保甲分別究辦失察地方文武從重參
處其硝磺火藥並責成守口員弁嚴行稽查毋
許偷漏出洋如有疎縱事發究明亦卽從嚴參
辦

道光十八年十二月十六日奉到

硃批該部議奏單併發欽此

陶文毅公全集卷二十七目錄

奏疏

河工

查議挑辦徒陽運河章程摺子

籌議修築練湖隄閘以利漕渠附片

會同江督奏請借款修建練湖黃金等閘水利要

工摺子

驗收徒陽運河黃金張官閘座完工摺子

會同江督覆奏暫緩起除徒陽運河兩岸積土並

挑河修埂摺子

請加 河神 風神封號摺子

會同

欽差總河勘辦河湖運道情形摺子

會同

欽差總河議覆毋庸改河摺子

覆奏革除河工積弊附片

奏疏

河工

查議挑辦徒陽運河章程摺子

奏爲查議徒陽運河挑辦章程恭摺覆

奏仰祈

聖鑒事竊

臣

承准軍機大臣字寄道光七年八月二十

二日欽奉

上諭御史蔣泰堦奏酌籌徒陽運河挑工一摺據稱徒陽運河小挑派丹徒等四縣承辦大挑則調派通省中缺分最優之十餘州縣協挑大半距工迢遠又值開徵收兌不能兼顧悉委幕友丁書此輩素未諳習

工程夫頭等乘機挾制昂價居奇稍不遂意紛紛鬩散又有道府委員等刁難需索除由司庫領銀外約計各州縣賠款多則萬餘金少亦七八千金實皆募友丁書朦混開銷委員及夫頭等訛詐吞蝕實用到工不及十之三四仍易停淤萬一軍船由內河出江臨時閘滯關繫非輕等語徒陽運河爲江浙軍船經由要路全在挑挖寬深俾重運遄行無阻著陶澍督同藩司梁章鉅將應如何委員辦工之處熟籌妥議並責成該管道府盡心督辦務令工員領銀核實支銷免其賠墊責以疏濬俾河流通暢糧艘得以遄行

該御史摺著鈔寄閱看等因欽此當經恭錄轉行欽
遵查議據蘇州布政使梁章鉅常鎮通海道劉名
載會詳請

奏前來查徒陽運河自丹徒縣境江口起至丹陽縣
之呂城地方止綿長一百四十餘里水無來源全
藉江湖灌注潮汐挾沙而行潮落沙停易致淤墊
年年挑浚非不寬深而春水未生江湖未旺之時
河流終於微弱內如丹徒縣之豬婆灘接鹽廳便
益橋流水洞王家灣刀山對奶野狗墩等處皆係
活沙膠泥隨浚隨漲尤爲著名累工向係六年大

挑一次由兩藩司在於蘇松常太揚通六府州屬酌派十一縣與鎮江府屬丹徒丹陽金壇溧陽四縣分段承辦其餘各年冬令擇淺小挑歸徒陽壇溧四縣承辦或有積淤較重該四縣力難勝任隨時確核情形酌添外府屬縣二三員幫辦所用經費並不請動正項錢糧但支丹徒縣樂生洲官租銀五千八百餘兩及司庫匣費等銀大挑之年二萬餘兩小挑之年一萬餘兩事竣造冊報銷一切土方夫工向有成例不能加增而工費日形昂貴嘉慶四年十四年屢經議定江南有漕各州縣每

年公捐協貼誠以浚河運漕凡有漕州縣皆分所
應辦大挑六年一次係於通省內擇其力量稍寬
者派委十餘員因缺分之有餘補工用之不足以
公濟公尙不致過於竭蹶卽徒陽壇溧四縣年例
挑辦其賠累雖較多於他邑然於例價之外得有
協貼而工長費鉅之年又得添員幫辦若使經理
得宜不爲家人書役朦混開銷其力亦尙可支持
惟時值漕倉收兌殷忙各工員勢不能常川駐工
親身查察或遣丁胥或交親友卽無染指圖利之
心而夫役終於輕視不受約束更有不肖之徒先

於雇夫時暗講折頭白喫乾分甚至剋扣工價侵
肥入橐遂爲夫頭把持挾制百弊叢生此賠累所
以日添而挑工易致草率也臣與藩司梁章鉅悉
心酌議以此案挑浚工程計長一百餘里爲期不
過月餘承辦之地方官不能親身督工卽不免於
諸多弊竇計惟有慎於用人方可以杜絕諸弊而
用人之中則莫如令承辦州縣自舉其平素相信
廉幹之員無論實缺候補佐貳均准其詳明派調
赴工代辦蓋其人旣係素信自必結實可靠足以
稽察夫役丁胥朦混開銷之弊於承辦者所領經

費既不致稍涉浮糜卽不致更形賠累且代辦之員如果經理得宜認真挑辦卽予記功嘉獎倘有草率偷減立即撤參亦責有攸歸各思奮勉以視悉委諸親友丁胥其情形迥不相同上年大挑之年卽係照此委辦頗爲得力嗣後應循照辦理至向來查工委員本無實濟近年早已裁撤自不慮再有滋擾又所用挑夫向由夫頭赴淮揚等處包雇每有浮冒夫數扣價入己之弊亦應令代辦之員於開工時親自點驗倘夫數不足卽拏該夫頭交縣究追衆夫臨工怠玩偷安卽係夫頭督率不

力立予柳示在局丁書人役如敢婪索規費許該
夫頭具稟查究仍令代辦委員隨時嚴察庶爲切
實至於挑挖之淺深全憑誌椿灰印封墩惟易於
移動擡高卽可從中滋弊現據該司道核議請於
誌椿左右凡有木石牆堦堪以存識之處一體標
明寬深丈尺使無混淆亦爲杜弊起見總之任事
在於得人有治人卽有治法向來此案工程經理
不得其人誠不免有累於官而無益於工今循照
上年成例專責代辦工員切實經理仍責成常鎮
道鎮江府盡心實力認真督察自可以祛除諸弊

工竣後由臣再行親往驗收總期工歸實用則挑
浚自必寬深費不虛糜在工各員自不致於賠累
矣所有查議緣由是否有當理合恭摺覆

奏伏乞

皇上聖鑒謹

奏

道光七年十二月初六日奉到

硃批另有旨欽此同日奉到道光七年十一月二十一

日內閣奉

上諭陶澍奏查議徒陽運河挑辦章程一摺前據御史

蔣泰堦奏徒陽運河挑工向由於幕友丁書之朦混
開銷及夫頭等之訛詐吞蝕致挑濬不能如式易於
停淤當飭該撫督同藩司熟籌妥議茲據查明積弊
在所不免皆由於承辦州縣正值漕倉收兌之時不
能常川駐工查察所致上年大挑運河卽將此弊革
除令該州縣自舉所知詳明調派赴工代辦頗爲得
力著照所請嗣後卽照此辦理責令承辦州縣於實
缺及候補佐貳內各舉素悉廉幹之員詳明派赴工
次令其代辦如查出夫頭有浮冒夫數任令衆夫怠
玩偷安及在局丁書人役婪索夫頭規費等弊隨時

送交該縣懲辦務令將挑挖寬深丈尺一體標明使
無淆混仍責成該道府認真督察工竣後該撫親往
驗收總期積弊盡除運行通暢無得有名無實該部
知道欽此

籌議修築練湖隄閘以利漕渠附片

再

臣

查徒陽運河水無來源專藉江潮挾沙而來

歲須挑挖大挑年分工段綿長一百數十里例銷亦止三萬餘兩不及河工一草壩之費本屬無從偷減不慮不歸實用惟兩岸山鑿山而成高崖壁立出土維艱如豬婆灘野狗墩刀山對奶等處尤形陡峻紅水溼泥出於山麓挑挖愈深則崖腳愈虛傾卸入河阻遏彌甚與別處河道情形迥異近來大江多有沙漲京口潮來勢緩一值西風刮耗潮入更稀兼之重空二運經過時正當冬盡春初

雨水未生江流尙涸雖挑濬已深而亦無潮可入
實爲漕運之一累

臣

思糧船經行南北運河自清

江浦至高寶一帶則有洪澤湖自黃林莊至韓莊
一帶則有微山湖自夏津至東昌一帶則有南旺
安山等湖皆蓄爲水櫃俾資緩急未有但恃挑工
無水接濟如徒陽運河者也溯查從前原有練湖
一所收納長驪諸山八十四畝之水北接丹徒境
謂之上練湖南接丹陽城謂之下練湖周圍共一
百六十里瀾注渟渟著古名曲阿後湖又曰練塘始
自晉時迄於唐宋皆加修治盜決侵耕之禁甚嚴

每於春夏蓄水秋冬濟運遇淺涸時但放湖水一寸卽爲運河一尺宋元史志皆載其事明史亦言丹徒以上運道視江湖爲盈涸京口閘底與虎邱塔頂平可知挑河無益蓄湖爲要等語惟查此湖舊隄自康熙年間上練湖已改民田升科僅存下練湖四十里但能灌田不復能濟運所有涵洞滾壩幾同虛設其運河舊設之奔牛呂城陵口黃泥新豐大壩等閘亦多就頽廢每當軍船停淺無策可施臣此次勘視運河周歷上下練湖親至湖心亭彌望荒煙水深不及尺許因思上練湖固難議

復卽下練湖亦未易言挑浚第就現存之湖加築隄堰遇山水漲發亦可蓄至七八尺果能申嚴決洩之禁收蓄渟涵俟冬春淺涸時開溝引水從湖東北角之張官渡啟涵放入運河將下游之呂城等閘堅閉勿泄使水勢迴激向北而西縱京口潮來不旺亦足資濟急其上練湖初受山水處名曰莊前河水分兩道一係正流穿田南去卽下練湖之源也一係分支循溝東去則黃泥壩入運之水也其分支之處向設黃金閘一座以擊東支水使並歸下練湖無如上練湖旣改民田下練湖之水

仍須自上練湖迤邐而來中間雖有橫埂而南北地勢相平下練湖之水蓄至七八尺則上練湖之用亦淹至二三尺矣是以居民不利閘之存而反利閘之廢遇春夏水發時輒將黃金閘決開使水向黃泥壩直洩無餘而下練湖已無水可蓄不俟秋冬旱形淺涸矣現在黃金閘廢壞無存實由於此雖愚民無知然田既升科亦難聽其淹浸惟有就水所經行處兩岸先築隄埂以次修復黃金閘使水歸下練湖足資多蓄而不致迴漾增高以淹上練湖之用則濟運之源裕矣仍將運河各閘擇

要興修查照舊章依時啟閉俾湖水放出尺寸皆歸有用於運道情形可期有益惟是工鉅費繁非旦夕所能奏效而一勞永逸之策亦無踰於此容俟籌有款項再細勘辦以利漕渠於農田灌漑亦不無小補謹附片具陳伏乞

聖鑒謹

奏

道光七年十二月初六日奉到

硃批妥籌經久之策務收實效欽此

會同江督奏請借款修建練湖黃金等閘水利要

工摺子

奏爲籌議練湖水利請借動銀款擇要興修仰祈

聖鑒事竊照鎮江府之徒陽運河爲江浙兩省漕船要
道該處原係鑿山而成惟藉一綫江潮引納通舟
而潮來挾沙易致淤淺近年大江多有漲沙梗塞
潮勢每遇西風刮耗潮入更微兼漕船往返時值
冬盡春初雨水未生江潮尙澀無歲不有阻滯皆
因水無來源所致殊形掣肘查丹陽縣有練湖古
名曲阿後湖在運河西岸收納長驪諸山八十四

汶之水周圍一百六十里康熙年間始將上練湖一百二十里改爲民田升科下練湖亦逐漸就湮百十年來湖存無幾閘堰亦俱壞闕收水無多查此湖自唐宋以來盜決侵耕之禁甚嚴向稱三分灌田七分濟運自練湖廢而徒陽運河歲藉挑挖實爲繁費緩急靡恃臣陶澍前於嘉慶二十一年巡視南漕任內曾

奏請修治道光七年冬因挑河之便復親行履勘始知練湖居高臨下正得瀉水濟運之宜本可無須挑浚但當加築隄埂方能多蓄其湖身正北之黃

金閘地近莊前河上承馬陵橋來水下達范家溝
入運尤爲全湖咽喉必須修復以資鈐束並將濱
湖各涵閘擇要興修當經附片具陳欽奉

硃批妥籌經久之策務收實效欽此上年十二月回空

漕船阻淺經

臣

蔣攸銛路過鎮江府飭該州縣設

法籌辦旋因漕船改由橫閘進口而下游之宋家
村姚灣至丹陽界之定山灣一帶多有阻滯經該
府趙光祿馳往上下練湖相視湖水經由之路插
立誌椿復赴運河下游趕做活壩攔蓄將村民於
黃金閘廢址所築之土壩啟通掣動湖水由范家

溝流放運河次日勘驗運河之黃泥閘一帶增水
二尺其餘各處亦增一尺餘寸不等查驗練湖誌
椿通湖牽計祇消水二寸六分是前人所稱湖水
放一寸河水增一尺之語實爲信而有徵本年交
春雨澤稀少運河水淺復經該府縣將漕船提過
丹陽南薰閘下板卽日啟開練湖東南角涵洞放
水濟運各船亦得銜尾前行查練湖廢弛已久茲
旣試驗有效自應設法修理惟經久之策必須全
湖加隄築埂修復運河諸閘及濱湖涵洞層層攔
蓄方能迴漾接濟至丹徒鎮以上統計工用不下

一三十萬經費較繁惟有先其所急擇要興辦現
勘得黃金閘舊址適當衝隘既爲蓄水要樞尤爲
放水關鍵急應修復以備蓄洩其瀉水入運之范
家溝在丹陽縣上游二十五里該處切近黃泥壩
地方嘉慶二十二年建有黃泥閘一座彼時亦爲
攔蓄上游江潮而計現查所建之閘在范家溝北
數百步若黃金閘放水入運反在黃泥壩之南不
能蓄水迴漾上游地位倒列殊乖措置可見彼時
但知有江潮灌入運河全不知有練湖可以放水
入運無怪自修造以來迄未見效今亦漸就傾圯

應將黃泥閘移建稍南五里之張官渡其地在范
家溝下游係練湖東北角舊有涵洞遇緊急時將
閘板堅閉或從黃金閘放水或從濱湖涵洞放水
均可迴激北上源源接濟此二閘關繫最要卽將
來經費稍裕大修練湖亦係必應先辦之工現既
籌議興修應卽擇要趕辦惟採置新石有需時日
現據該鎮江府趙光祿查得下練湖東隄舊有四
閘地勢稍高未能放水入運久成虛設酌留其一
以存舊跡其餘三閘石料卽可全行拆運爲修建
黃金閘及張官渡新閘之用於要工可期迅速逐

加確估修復黃金閘木石各工及築壩戽水添換
繩板各項需銀一萬四千兩移改黃泥閘至張官
渡需銀一萬兩共需銀二萬四千兩稟經蘇州布
政使梁章鉅勘驗實係切要應辦之工所估銀數
均屬核實估計加倍撙節請免其報銷並請於司
庫封貯銀內先行借給卽委該府趙光祿承辦俟
新漲沙洲歸公召佃後徵存租息陸續歸款等情
復經臣陶澍親詣相度帶同該府指示機宜札商
臣蔣攸銛意見相同應卽趁春水未深照數發銀
趕辦興工如有尙須酌辦之件另容籌措所借封

貯銀兩查各屬有新漲沙地前經臣陶澍遵

旨議將租息歸公爲通省水利之用接准部覆奉

旨允行現在飭屬妥議條款俟覆

奏後收到租息卽將此項借款先行歸還封貯貴成

該府趙光祿一手經理督同丹徒丹陽二縣遴員

趕辦以期工歸實用事竣稟驗不任稍有草率偷

減並請免其報銷以歸簡捷所有籌議練湖水利

請借封貯銀款擇要辦理緣由謹合詞恭摺具

奏伏乞

皇上聖鑒訓示謹

奏

道光九年三月二十三日奉到

硃批另有旨欽此同日奉到道光九年三月十一日內

閣奉

上諭蔣攸銛等奏籌議練湖水利請借動銀款擇要興修一摺江蘇丹陽縣練湖廢壞已久據該督等督飭該府縣詳加勘驗黃金閘適當衝隘亟應修復以備蓄洩其舊建黃泥閘應移建稍南五里之張官渡實係必應先辦之工並查明下練湖東隄舊閘酌存其一其餘三閘石料即可全行拆運爲修建黃金閘及

張官渡新開之用所有估修黃金閘木石各工及築壩厚水添換繩板各項並移改黃泥閘共需銀二萬四千兩著照所請於司庫封貯銀內先行如數借給責成該管知府一手經理督同丹徒丹陽二縣遴員趕辦所借銀兩俟新漲沙洲歸公召佃後徵存租息陸續歸款免其報銷該督等務當嚴飭該府縣認真辦理以期工歸實用事竣親往核實驗收毋任稍有草率偷減該部知道欽此

驗收徒陽運河黃金張官閘座完工摺子

奏爲修建黃金張官兩處閘座驗收完竣仰祈

聖鑒事竊照鎮江府屬之徒陽運河爲江浙兩省漕行

要道前經

臣

等議將練湖上首之黃金閘修復以

收蓄湖水並將運河范家溝北之黃泥閘移建於
迤南五里之張官渡以迴濟上游估需工料銀二
萬四千兩

奏奉

諭旨准於司庫封貯銀內先行如數借給責成該管知
府一手經理督同丹徒丹陽二縣遴員趕辦所借銀

兩俟新漲沙洲歸公召佃後徵存租息陸續歸款免其報銷等因欽此飭據鎮江府趙光祿將黃金閘工程交丹徒縣吳浚承辦於三月十五日開工移建張官閘工程交丹陽縣朱清耀承辦因俟重運糧船過竣始能煞壩於四月十五日興工該府仍督同大小各委員親駐工次不避風雨日夜籌辦並經藩司梁章鉅親往督催臣等復疊札諄飭認真趕辦旋據該府稟報黃金閘於五月二十一日工竣張官閘於六月十七日工竣臣等因各有審辦要案不克分身卽委藩司梁章鉅於催工之便覆

實驗收茲據該司稟稱查驗黃金閘共長二十七丈高二丈連海漫石二十一層黃泥閘共長五十一丈二尺高一丈八尺六寸連海漫石二十層核對原估高寬丈尺相符如式砌造毫無草率偷減當飭將閘牆幫護堅實趕緊清釐河底啟除土壩一面先將跌壩塘刨挖格外寬深俾資容納於六月二十日開壩通水等情前來臣等伏查練湖閘座失修水無蓄洩以致數百里運河僅藉江湖一線爲之灌注每遇冬春之際重空兩運經臨潮落水枯動形掣肘茲蒙

恩准借項興修免其報銷俾得撙節綢繆將黃金張官
二閘擇要先修完竣實屬工堅費省設遇京口淺
阻改由橫閘行走足收濟運通漕之益惟查練湖
廢壞已久據該府勘報湖之西面及東北一帶間
有淤灘稍占蓄水地步上湖溝港逼窄山水不能
暢達若能浚湖之淤藉以培隄實屬一舉兩得現
值農事正忙且湖水較長容俟秋冬間再行酌辦
至於籌蓄放之機宜復巡查之舊典侵耕盜決禁
令宜嚴涵洞誌椿稽察必慎以及下游各閘之攔
蓄夫役住房之建置均應釐定章程俾垂經久除

俟妥籌另辦外所有開工完竣驗收啟壩緣由謹
合詞恭摺具

奏伏乞

皇上聖鑒謹

奏

道光九年七月二十八日奉到

硃批立法不難務要實力行之妥爲籌辦欽此

會同江督覆奏暫緩起除徒陽運河兩岸積土並

挑河修埂摺子

奏爲遵

旨查議徒陽運河岸旁積土因工鉅費繁籌款維艱應
請從緩挑辦恭摺覆

奏仰祈

聖鑒事竊臣等承准軍機大臣字寄道光九年四月初
一日奉

上諭御史朱壬林奏籌濬徒陽運河一摺江蘇徒陽運
河每歲興挑仍形淺阻殊於漕運經行大有關繫據

該御史奏稱欲通運道先濬河身欲濬河身先除岸
旁積土所奏不爲無見著蔣攸銑陶澍會同悉心籌
議如何將岸旁積土設法起除並挑出泥淤不得再
於岸旁堆積之處體察情形據實奏明督同承辦各
員妥爲經理至該督等前經奏請修復下練湖閘壩
以期蓄水恐停蓄稍深於上練湖民田易至浸澇著
該督等一體查勘具奏該御史原摺著鈔寄閱看將
此諭令知之欽此遵

旨寄信前來當卽恭錄轉行欽遵籌議勘辦去後茲據
鎮江府知府趙光祿督同丹徒縣吳浚悉心查勘

運河兩岸積土歲久堅實無虞傾卸請俟經費充裕再行挑除等情稟經蘇州藩司梁章鉅常鎮道劉名載覆核轉詳請

奏前來

臣

等伏查鎮江府屬之徒陽運河本係鑿山

而成水無來源全藉江湖灌注而自丹徒以下至常州蘇州勢若建瓴難於存蓄每日渾潮兩至水去沙停終年淤積更加豬婆灘野狗墩等處活沙涇泥隨浚隨漲當空重經由之際正潮枯水落之時年年擇段小挑隔六年大挑一次從前挑出淤泥於兩岸隨便堆積百數十年層層加增遂若崇

山峻嶺每遇風雨仍復傾卸入河嘉慶十五十七等年會議借款挑除因工鉅費繁未能興辦後於嘉慶二十一年間臣陶澍於巡視南漕任內

奏請起除兩岸積土經前督臣孫玉庭逐段查勘因地就勢抽開土巷收買山背民田山地爲挑河堆土之所奏奉

諭旨給項興辦在案現查各土巷與原估寬深丈尺淺窄間有不符蓋因挑夫貪圖近便每乘工員照察未周卽在土巷內隨地拋置亦勢所不免臣陶澍前於道光六年冬驗收挑工會將寄土岸旁之工

員鈕信友奏明勒令賠挑近年以來均知儆戒由土巷傾棄山背但新土雖不致增積而舊土究未能啟除論經久之計惟有將鎮江兩岸之土移補高郵寶應一帶緯道最爲一舉兩得第查運河自京口至丹徒鎮計二十里河長三千五百餘丈就兩岸併計已有七千餘丈其間積土或與城垛相平或高出民房五六尺及一二丈不等又自丹徒鎮至丹陽縣境大挑年分煞壩之處爲止計程百餘里積土更加數倍若起除淨盡非百餘萬金不可

國家經費有常驟難籌此鉅款且現據該府縣勘明
兩隄老岸歲久堅實卽遇大雨時行亦不致有衝
刷之虞應請暫行從緩俟籌有款項再行興辦以
後每年冬底挑撈運河仍責成該管道府嚴督工
員認真稽察務令出土至山後官置地內堆積不
准再在土巷傾棄挑工完竣仍令承辦各工員酌
留人夫將拋撒寄土收拾乾淨馬路土巷剗削平
整驗明方准撤散以免新積所有每年承辦挑河
各縣自舉工員代辦一節行之數年頗有實效如
另派委員經理殊多掣肘亦應仍循其舊毋庸另

議更張至下練湖水蓄深恐淹上練湖民田

臣等

亦早經慮及道光七年冬間

臣

陶澍並會附奏陳

明在案惟查該處湖形南北雖屬相平而上練湖

係南源經行之處地勢較高其近水蘆灘本屬無

多但須畧築隄埂卽資防衛與下練湖隄外民田

四萬餘畝之全藉湖水灌溉者情形迥殊斷不能

顧少失多任令湖涸且此時修建黃金閘止係復

舊並非增新聞板尺寸卽按地勢高低依時啟放

無慮上湖淹浸仍當勸諭各業戶於農隙時浚淺

修隄俾資久遠所有

臣

等遵

旨籌議暫緩起除積土及挑河修埂各緣由謹合詞恭摺覆

奏伏乞

皇上聖鑒謹

奏

道光九年七月二十八日奉到

硃批知道了欽此

請加 河神 風神封號摺子

奏爲奏

聞請

旨事竊照湖河一帶崇祀

神祇屢著靈異疊經

奏蒙

加封並

頒賜扁額江南河口爲清黃交匯之區堰圩大隄爲生民

保障之具尤賴

靈昭貺佑利漕衛民本年洪湖非時異漲爲從來所

陶文毅公全集

卷二十七

奏疏

三

未有較之道光四年堰圩失事時尙大至二尺三寸不但重運經行逆流涉險深恐難達

天庾而淮揚兩郡形居釜底閭閻時切恐惶兼之黃水若不遞落則清黃高下無多卽灌塘亦難得手

臣

張井焦思之餘倍深畏懼每至

黃大王祠及

風神廟中虔誠告敬述我

皇上軫念河湖勤恤民隱之至意以冀仰荷

神庇

臣

陶澍到浦後亦時時詣廟拈香敬申禱祝今

洪湖盛漲歷一月之久自三月二十六七日後屢

經西北風暴掣卸石工潰及子堰每當危險萬分
之際卽風平浪息或忽轉東南堰吁一萬七千餘
丈之長隄竟得保全兩郡民生俱各安帖而河水
亦復遞落清水得以暢出重運順軌渡黃毫無阻
滯凡屬官弁軍民無不同聲感頌以爲皆賴我

皇上誠敬昭虔

神祇靈佑之所致恭查河口崇祀

神祇內

天后原蒙疊次

加封護國庇民妙靈昭應宏仁普濟福佑羣生誠感咸孚

顯神贊順共二十四字復於嘉慶五年

加封垂慈篤祐四字

金龍四大王原蒙兩次

加封顯佑通濟昭靈効順八字復於嘉慶二十五年

加封惠孚二字惟

黃大王於乾隆三年

敕封靈佑襄濟大王嘉慶二十五年復蒙

加封顯惠二字

風神於雍正六年

敕封清和宣惠風伯之神尙未另請

加封臣等謹不揣冒昧恭摺

奏懇

天恩於

黃大王

風神各求

敕加封號以答靈庥而遂輿情是否有當恭候

聖裁謹此奏

聞請

旨伏乞

皇上聖鑒謹

奏

道光十一年五月二十五日奉到

硃批朕誠欣誠感另有旨諭欽此同日奉到道光十一年五月十七日內閣奉

上諭陶澍等奏請加

河神

風神封號以答靈庥一摺本年洪澤湖盛漲兼值西北風暴掣卸隄堰勢甚危險該督等虔籲

神祠風勢順轉長隄得以保固重運渡黃毫無阻滯神庥不著河漕順行朕心誠欣誠感著該衙門於原

定

靈佑襄濟顯惠大王

清和宣惠風伯之神號敬謹各擬加封候朕酌定俾
湖河永慶安恬益昭靈貺欽此道光十一年七月初
四日准禮部咨稱

河神封號字樣奉

硃筆圈出昭感

風神封號字樣奉

硃筆圈出康濟欽此

陶文毅公全集

卷二十七

奏疏

三

會同

欽差總河勘辦河湖運道情形摺子

奏爲遵

旨會勘河湖運道情形並妥籌辦理事宜恭摺覆

奏仰祈

聖鑒事九月十七二十四二十七等日疊准軍機大臣

字寄內閣奉

上諭據御史鮑文淳奏黃河入湖恐妨運道請豫籌疏
浚以利轉運一摺宗人府府丞潘錫恩奏全黃入湖
貽害甚鉅請急籌補救以挽全局以利漕運一摺

臣

張井前奏湖水漲滿竭力防護並籌辦堵築一摺著
穆彰阿陶澍張井會勘籌辦欽此伏查江南河丁運
道關鍵全在洪澤一湖今桃南十三堡地方黃水
入湖如果湖內受淤過甚勢必淤及運河所關誠
非淺鮮臣張井於失事之後屢赴該處查勘探量
並將大概情形具

奏在案臣穆彰阿臣陶澍先後馳抵清江浦復公同
敬繹

聖諭並細閱宗人府丞潘錫恩原摺查該府丞與御史
鮑文淳所奏雖詳畧不同總以淤湖淤運爲可慮

非目覩情形不能得其要領卽遵

旨會同查看於初三四日親往龍窩汛決口地方履勘情形該處黃水入湖卽由吳城七堡仍入黃河其間靠隄之縱橫二三十里多已受淤但該等處係在桃源縣南岸二十圖之內道光五年以前均係莊田廬墓並非湖身至黃水入湖東至吳城七堡而止既不能入束清壩卽不能灌入運口又何能淤及淮安寶應高郵以下至吳城七堡順清河禦黃壩等處清水暢出刷滌黃淤現據河員稟稱七堡以下至海口逐段測量已刷深四五尺不等現

在湖水尙存一丈九尺餘寸較盛漲已消二尺有餘自後再見消落卽當遵奉

諭旨次第堵閉山圩各壩河俾湖水不至分洩專力刷黃以收蕩滌之效兼可堵閉昭關壩及高郵四壩以期下河田畝早爲涸復至潘錫恩所稱全黃入湖爲從來未有之事將來堵合復故勢必全湖俱成平陸此一節最爲緊要因查嘉慶二十五年河南儀封漫口以前如李家樓邵家壩等處皆係全黃入湖且乾隆五十一年桃源司家莊漫口卽在現今口門之上二里與此時情形無異似不至淤

成平陸至蕭南廳啟隄掣溜一節當桃南失事時
有請開攔湖壩者有請開王營減壩者亦有請開
蕭南之毛城鋪者臣張井皆未敢冒昧舉行今臣
等復公同商酌桃南缺口既已需費不貲豈可又
於上游另挖口門淹及地方益糜經費况蕭南奪
溜則以下數百里正河反致淤成平陸所稱八九
十萬兩尙不敷挑挖引河之用六年減壩厲民之
事未可援照惟查南河中滿之患總在桃南桃北
外南外北山安海防六廳之間計程三百餘里從
前啟放減壩大興挑浚徒勞無益緣其挑浚之處

在禦黃壩以下而禦黃壩以上轉更高仰清水無從暢出現在桃南決口黃水入湖從吳城七堡仍流入黃自吳城七堡至禦黃壩以下直至海口凡外南北下汎及山海兩廳百餘里之內已刷滌漸深而吳城七堡以上高仰如故卽在桃南北下汎外南北上汎之間計程二十餘里目下黃流入湖正河乾涸凡此高仰之處正可施工若趁此機會就臣張井擬估抽溝之處全行大加挑浚除去中滿之患俾禦黃壩以上漸就底平實係一舉兩得約計所費不過四十萬兩左右於全河深有裨益

如蒙

俞允容臣張井會同臣陶澍另行確估隨時具

奏辦理至於來年重運事宜惟當恪遵

諭旨察看情形如堵合之後清水暢山糧船自易行走
倘仍難暢出卽將束清禦黃二壩及臨清堰等處
趕緊收束修復仍行灌塘之法不致貽誤所有潘
錫恩與鮑文淳所奏應均毋庸置議謹將臣等會
勘籌議緣由合詞繕摺覆

奏並繪圖貼說恭呈

御覽伏乞

皇上聖鑒訓示謹

奏

道光十二年閏九月二十日奉到

硃批另有旨欽此同日奉到道光十二年閏九月十四

日內閣奉

上諭前因龍窩汛決口特派穆彰阿前往南河查辦昨據穆彰阿等會勘河湖運道情形該處黃水入湖卽由吳城七堡仍入黃河其靠隄縱橫二三十里多已受淤係在桃源縣南岸二十圖之內並非湖身至黃水入湖東至吳城七堡而止旣不能入束清壩卽不

能灌入運口至吳城七堡順清河禦黃壩等處清水
暢出刷滌黃淤自七堡以下至海口已刷深四五尺
不等俟湖水再消卽可堵閉山圩各壩河俾湖水專
力刷黃兼可堵閉昭關壩及高郵四壩俾下河田畝
早爲涸復並查明乾隆五十一年桃源司家莊漫口
卽在現今口門之上二里與現在情形無異其不至
淤成平陸尙屬可信其吳城七堡至禦黃壩以下直
至海口百餘里內刷滌漸深惟吳城七堡以上高仰
如舊卽在桃南北下汛外南北上汛之間計程二十
餘里現當正河乾涸正好趁此機會估辦抽溝大加

挑浚約計所費不過四十萬兩著陶澍張井相機妥
爲籌辦至回空軍船截至閏九月初五日止已渡黃
者計一千三百餘隻本年歸次不誤惟來年重運仍
著陶澍等察看情形如堵合之後清水竟能暢出卽
復舊規倘仍難暢出卽將束清禦黃二壩及臨清堰
等處趕緊收束修復仍行灌塘之法不許貽誤欽此

會同

欽差總河議覆毋庸改河摺子

奏爲遵

旨會勘江境改河情形悉心籌議恭摺覆

奏仰祈

聖鑒事竊

臣

陶澍

臣

張井先經接准軍機大臣字寄道

光十二年閏九月二十八日奉

上諭朱士彥另片奏本年二月入都途遇嚴烜言及現在惟有將黃河改於北岸自桃源以下以北隄爲南隄另築北隄其現在清口以下令讓淮水洗刷於安

東地方會黃由舊河身入海另於北岸開運河數十里約需費二百萬可免創塘灌放等語改河數十里非旦夕可辦且新築北隄事體重大經費亦復不貲是否可以籌辦之處著穆彰阿等履勘形勢詳查利弊悉心妥議具奏欽此

臣

敬徵於本年十月二十九

日在于家灣工次接准軍機大臣字寄十月二十

三日奉

上諭改河一事前旨交穆彰阿會同陶澍張井查辦現在穆彰阿啟程後著敬徵會同陶澍張井履勘形勢詳察利弊悉心妥議具奏將此諭令知之欽此當卽

恭錄分咨一體欽遵隨經穆彰阿將朱士彥原奏

摺片三件移咨前來

臣

張井復將本年春間前河

臣

嚴烺路過清江面交

臣

擬改黃河運河圖式一

件與

臣

敬徵

臣

陶澍閱看

臣

等查朱士彥片奏內

稱改清口之議擬改至下游安東縣城以上蕭工
地方較現今清黃交滙之處約下去五十餘里則
黃水建瓴之勢約低五六尺洪湖之水少蓄五六
尺可以暢出刷黃毋庸倒塘矣應於黃河北岸之
桃源清河交界處相度地勢築新北隄一道下至
安東縣而止計工一萬八千丈築隄高三丈寬三

丈共計新隄二百萬兩安東縣上新北隄之北創挑新北運河一道運河之北再築新運河隄上至現在運河之豆瓣集止約估需銀六十萬兩以現在黃河北隄作爲黃河南隄以舊黃河高家灣以下至安東以上止作爲清水尾間重空軍船仍出三閘三壩靠隄下放在安東以上渡黃由新運河上行至豆瓣集歸運河約現行之路軍船計多七八十里添作柴壩以及創隄放河等費約需三十萬兩舊北隄至新北隄約寬二十里並無城郭鎮市不過數十村莊給價遷移約需銀二十萬兩等

語前河

臣

嚴烺圖內係自桃北適中之顧工起改

河斜穿遙隄跨過中河鹽河下達山安廳蕭工之

北復穿入遙隄挽歸蕭工正河

臣

等於十一月三

十日會同前赴桃源北岸按圖履勘核對原議並

帶同司員熟諳工程之將備等悉心籌議逐處相

度丈量由中河以至山安廳界統計顧工至蕭工

就遙隄北岸續量共長二萬四千餘丈原議只估

創築黃河新北隄並未估計挑河查遙隄以北至

擬築新北隄寬處須六七百丈窄處須四五百丈

若不挑有引渠導河東注則百餘里平陸之地溜

行散漫必致普律受淤兼恐南衝北折兩面新舊隄工均難保守自應酌爲估挑以期順軌茲量顧工以北地勢過長若以孫工作爲河頭計少十八里尙可節省應挑新河計長一萬九千九百餘丈深八尺口寬二十五丈底寬二十一丈八尺自桃北包家民房起至蕭工止須築新北隄一道長二萬三千丈高三丈頂寬三丈底寬十八丈再於新北隄之北自中河廳十里堡起至山安廳蕭工止須挑新中河一道長二萬二千五百九十丈口寬二十丈底寬十六丈深一丈新中河之南北應築

緯隄各一道北長二萬四千五百九十丈南長二萬三千三百九十丈頂寬一丈五尺底寬十四丈高二丈五尺以上挑河築隄方價不一按例核算與原議二百萬兩之數幾至倍增又遙隄之內本有鹽河一道爲淮北引鹽及葦蕩左營柴船經行要道今旣爲新河跨壓雙金閘亦廢必得於新運河北隄以北仍挑新鹽河一道自洪家蕩對過起至陶家馬頭接入舊鹽河止長四千五百丈口寬十二丈底寬八丈深一丈又須築鹽河北隄一道長五千一百丈頂寬一丈底寬六丈高一丈再於

新中河北隄另建雙孔石閘以通鹽河此三項又
需銀四十萬兩左右其遷移百姓村舍墳墓賞卹
尙不在前數之內是改河之議卽事屬可行誠如
聖諭經費亦復不貲非旦夕可辦且查南河中滿之處
上自桃南北起下至海安阜上汎止計三百餘里
蕭工地界其中現在湖水暢出蕭工以上及安阜
下汎積淤之處雖漸刷深而山安海防至安阜上
汎未能一律深通卽使新改黃河可於蕭工歸入
正河而由蕭工以至安阜一百五六十里仍不免
中滿之患况擬改河頭之孫工水面較遙隄以北

內地計高一丈一尺除中流水深一丈河底計高
內地一尺新河挑深八尺則舊河底實高新河底
九尺其勢尙屬建瓴至河尾蕭工挽歸正河之處
現在水面高內地一丈二尺五寸除中流水深一
丈計河底高內地二尺五寸新河挑深八尺則舊
河底反高新河底一丈五寸水性就下驟遇高仰
則勢難強越必致兩岸皆成倒灌河身依舊淤高
引清至此仍難暢出刷滌又中河廳遙隄北首查
有積水一段東西長八里南北寬十五里深二三
四尺不等無可宣放勢難施工舊減壩之北張家

河頭東西因減壩屢次啟放地勢淤墊約二十餘里較現擬改之河頭河尾高至八九尺挑河至此又多梗阻滋費此又嚴烺未經目覩者誠恐舉之未幾廢卽隨之於漕運大有關礙所有改河原議臣等再四籌商實無把握應請毋庸置議謹將會同勘議實在情形據實恭摺具

奏伏乞

皇上聖鑒謹

奏

道光十三年正月初二日奉到

硃批知道了欽此

覆奏革除河工積弊附片

再

臣

接准南河督臣咨會承准軍機大臣字寄欽

奉

上諭有人奏河工積習廳員出息但問辦料州縣遊幕之徒藉署內熟識之人出入招搖其在河工者名爲外工類皆盤踞有年購料必經其手交收查驗如何朦蔽又復熟諳故能久爲河工之害等語向來河患往往生於無事之時在事大員不可不早爲慮及若廳員購辦料堆交收查驗任聽外工巧相朦蔽亟應從嚴查究著陶澍麟慶卽將河工向有積弊體訪禁

革廳員所購料堆如何驗收抽查務歸核實之處酌
議章程據實具奏至遊幕人等一經訪有實蹟卽行
嚴加懲辦等因欽此仰見

皇上慎重工需杜絕弊端之至意跪讀之下欽佩難名

臣伏思河工不外修防而修防需用料物汛地皆

須防守而防守必資衆力蓋一廳之段落甚多一

官之耳目有限河患生於無事所以處處派人者

不過借以守汛以免顧此失彼之虞斷不容任其

盤踞致滋朦混察訪從前弊竇原有外工家丁河

兵料戶堆夫人等勾串虛堆之事

臣自道光十年

到任後催漕防汛往來清河時時悉心查訪所有前項弊端業已革除每向河員切實諄飭工程務期穩固錢糧力求撙節苟非萬不得已實在緊要之工不許另案請

帑卽如道光十二年堵築桃源于工啟閉江口蔺家山加高洪湖隄堰各工最爲有事之年所用銀六百七十三萬餘兩較之從前道光六年另案專案用銀至八百六十九萬餘兩已減少數目不貲十三年卽減用至三百十四萬餘兩十四年更減至二百二十六萬餘兩較十二年另案各工銀又減

去一百二十餘萬十五年用銀二百九十四萬餘兩較十二年另案各工銀亦減去五十四萬餘兩卽上年用銀二百七十五萬餘兩數目比前年又減省十八萬餘兩在河臣督司工務節省已不遺餘力防弊實刻未鬆勁惟料物關繫錢糧工友究難深靠臣自應隨時隨地嚴行訪察一有堆料不實浮冒開銷等事卽當會同河臣嚴行懲辦以期工歸實用

帑不虛糜除飭各河道將查料章程如何驗收如何抽查詳細妥議具詳另行核實會

奏外謹先附片陳明伏乞

聖鑒謹

奏

道光十七年二月十二日奉到

硃批知道了欽此